

Jona

Profet kubä Anutu täño man buramikta bitnäñkuk

Yawetä Jona piä man iweränkañ ämetpeñ kuñkuk

1 ¹Yawetä Jona, Amitai täño nanaki ñode iwetkuk; ²Eruk gäk yotpärare pähap wäpi Ninive uken ku yäk. Kuñat-kuñari gwäjiwani wakiinik yabänpän-nadäk täñkuro unita pänku kome mähem man kehäromi, komigämän kañ yawet yäk. ³^bAnututä Jona man ude iweränkañ Jonatä Yawe täño man bitnäñpeñ ämetkuk. Ämetpeñ gäpe terak Tasis yotpärareken kwa yännpänä Jopa yotpärare gwägu dubiniken kuñkuk. Uken gäpe kubä Tasis komeken kwayän täñjirän kañ-ahänkuk. Kañ-ahännpänä Yawe kañmuntan kábop irayän nadänkañ Tasis kwayän gäpe suwanpeñ äronkuk.

⁴Eruk äronpeñ kuñjirän Yawetä mänit pähap peñ iwet-pewän piänjirän gwägu wakiinik täñkuk. Wakiinik tänpän gäpe imarayän täñkuk. ⁵Imarayän täñjirän gäpe täño piä äma umuntanpän anutu iniken iniken uken gera yänkuñ. Tänpän gäpetä pidäm tawän yännpänä tuñum ätu gwägu gänäñ ureñ tänpä äpmonkuñ. Ude täñ irirä Jona uwä gäpe miyäkiken äpmo dämpmon patguñ täñkuk.

⁶Patguñ täñjirän gäpe täño mähemitä äpmonpän Jona kañpän ñode iwetkuk; Gäk mebäri jideta dämpmon ño pat itan? Eruk aku! Gäkño anutuken gera yä! Yänjiri butewaki käwep nadän nimiñpän täñkentän nimiñjirän nämo paotne yäk. ⁷Ude yänjirän gäpe täño piä ämatä yännpän-nadäk tänpän yänkuñ; Eruk, netä täño mebärita imaka umuri pähap ño ahän nimitak yän kañ-ahäkta kären tänpän këna yäk. Ude yännpän kären täñjirä Jonaken ahänkuk.

⁸Jonaken ahänjirän kañpän ñode iwetkuñ; Gäk niwet yäk. Imaka ño netä täño mebäri terak ahän nimitak? Gäk ima piä täk täyan? Gäk de

^a 1:1 2Kn 14:25 ^b 1:3 4:2; Jer 20:7-9; Luk 9:62; 1Ko 9:16

naniktä äbätan? Gäk komeka de nanik? Ba netä täņo äma äbotken nanik? ⁹Yänjirä yäwetkuk; Näk Hibru äma yäk. Yawe Anutu kunum gänaņ nanik kome gwägu pähap yäwän ahänkuņo u oraņ imik täyat yäk.

¹⁰Ude yänpän Yawe kaņumuntaņ ämetkut yän yäweränä äma gäpe gänaņ itkuņo unitä umun pähap taņpän iwetkuņ; Yäke! Gäk umuri udewani imata täņkun? ¹¹Tänkaņ gwägu wakiinik täņpewän äneņi iwet yabänkuņ; Jide täņ gaminapän gwägutä wareņi nämo pärek? ¹²Yäwäwä Jonatä yäwetkuk; Näk yäpmänpän gwägu gänaņ maņpä äpmoņira uyaku gwägu wareņi nämo pärek yäk. Nadätat, gwägu wakiinik täyak u näka yänpän täyak yäk.

¹³Ude yäweränkaņ Jona täņo man nämo buramiņpän gäpe gwägu gägäni käda kwän yänpän keritä bumta täņ-iwatkuņ. Täņ-iwatkuņo upänkaņ gwägu wakiinik-inik täņkuko unita täņpä waņkuņ. ¹⁴Tänpä waņtäko Yaweken butewaki gera ŋode yänkuņ; O Yawe, äma ŋo gwägu gänaņ mäna äpmoņirän, gäk mebäri injinken itak yän niwetkaņ nibän äwaräkuk täņiri nämo paotne! Yawe, gäkņa nadänpän täņkaņ nintä terak nämo yäwen yäk. ¹⁵Tänpän äma unitä Jona yäpmänpän gwägu gänaņ maņpä äpmoņirän gwägu wareņi nämo patkuk. ¹⁶Tänjirän äma itkuņo unitä Yaweta bumta umuntaņpän bänep täņkwitakta gupe käbänj nikek ijij imiņpän Yaweta watä piä täņ imineņta yänkehärom taņkuņ.

¹⁷Tänpäkaņ Yawetä gwägu tom taņi pähap kubä iniņ kireņpewän Jona kämän äpmoņkuņ. Kämän äpmoņirä Jona gwägu tom pähap u koki gänaņ kepma bipani yarakubä ude patkuk.

Jonatä Anutu man iwerirän nadän imiņkuk

- 2** ¹Jona tom koki gänaņ patkaņ Yawe Anutuni yänpik man terak ŋode iwetkuk;
- ²Näk komi piäken patpän Yawe gäkken gera yänjira naniņ yänkun. Paotpaot komeken patkaņ täņkentän nam yänpän gera yänjira nadän namiņkun yäk.
- ³Imata, gäk gwägu pähap gänaņ pudät mabi baninik, gwägu mebäriken umu äpmoņkuro unita. Täņpän gäkņo gwägu pähaptä näk uwäktän namiņpän gwägutä taņi tokätpäņ nut mabän äpmoņkut yäk.
- ⁴Ude ahän namänpän ŋode nadänkut; Näk injamka dapunken nanik näwat kireņkuno upänkaņ ŋode nadätat; Gäkņo kudupi yotkaken äneņi api ärowet.
- ⁵Ume pähaptä uwäk täņpipiņpän nepmaņpän paorayän täņkut. Gwägutä näk it gwäjiņpän gwägu yenitä gwäknaken kwasikotkuņ.
- ⁶Näk gwägu gänaņ kome mebäriken äpmoņpän äpmokinik täņkut.

© 1:17 Jon 4:6; Mat 12:40, 16:14; Luk 11:30

Äpmonpän ukädagän itnañipän Yawe Anutuna, gäk komi piäken nanikpän wädän tädotpän nepmañpi pen api iret yäk.

⁷Iritna jirupmirayän täñirän Yawe, gäka nadänpän gerana gäkñjo kudupi yotkaken ahänkuk.

⁸^d Täñpäkañ ämawebe yäwük pukpuki orañ yämik täkañ uwä gäka nadän gamikinik tänañipän mäde ut gamik täkañ.

⁹Täj nähä bänepnatä kap teñoret gamañpän ärawa api täñ gamet. Täñpän yänkehäromtak man gäwetkuro u täkinik api täñpet.

Yäke! Paotpaotken nanikpän yämagurani mähemi u Yawe ubayän!

¹⁰Täñpäkañ Yawetä gwägu tom iwet-pewän gwägu tomtä Jona gwägu gägäniken añeñ mañpän kuñkuk.

Ninive kome mähemitä bänepi äyänutkuñ

3 ¹Täñpäkañ Yawetä Jona äneñi ñode iwetkuk;

²Eruk, gäk Ninive yotpärareken ku yäk. Kuñkañ manbiñam gäwerayän täyat u kañ yäwet. ³Ude yänirän Jonatä mani buramiñpän Ninive yotpärareken kuñkuk. Ninive uwä yotpärare tañjinik, kukñi ñonitä kukñi udude kweno uwä edap yaräkubä tärewek. ⁴^e Eruk, Jona yotpärare gägäniken yäput peñpän kepma kubä kuñpän yotpärare bämopiken itkañ gera terak ñode yänahänkuk; Edap 40 ude täreñirän Ninive yotpärare api peñ awähurek! yäk.

⁵Jonatä ude yänirän eruk, Ninive mähemitä Anutu täño man nadäwä bureni täñkuk. Nadäwä bureni täñpöpän mominita nadäwätäk täñpän, nak jop irit kadäni peñpän tek waki-wakipän täñkuñ. Ekäni ironji kudup udegän täñkuñ. ⁶Tänirä Ninive nanik täño intäjukun ämatä biñam u nadänkañ akuñpän tek täga yänopmäñpän peñpän tek waki-wakipän täñpän päñku kädäkut gänañ mañit itkuk.

⁷Tänkañ Ninive ämawebe kuduptagäntä nadäkta manbiñam ñode pewän kuñkuk; Intäjukun ämakät epän ämaniyetä ñode peñ täwetkañ, Kubätä ketem kubä nämoinik näñpek. Äma ba yawak, ketem ume nämoinik näneñ yäk. ⁸Nämo! Äma ba yawak imaka, tek waki-wakipän täñput. Täñpän ämawebe kuduptagäntä Anutuken yänapik man kehäromi yäneñ. Täñpän kuñat-kuñari waki u ba ämik täktäk täk täkañ u penen! yäk. ⁹Ude täñirä Anututä butewaki käwep nadän nimiñpän ninta kokwawak nadätak u peñirän nämo paotne yäk.

¹⁰Täñpäkañ manbiñam pewän kuñkuko u nadänpän buramiñpän ämawebe kudup wakiwaki mäde ut imiñirä Anututä yabänkuk. Yabänpänjä nadäk inçitkuko u yäpmän äyänutpän kowata pewän ahän yämikta nadänkuko u peñkuk.

^d 2:8 Sam 31:6 ^e 3:4-5 Mat 12:41; Luk 11:32